



REPUBLIKA E SHQIPËRISË  
KËSHILLI I MINISTRAVE

VENDIM

Nr.857, date 19.12.2003

PER

**MIRATIMIN E RREGULLORES SE FUNKSIONIMIT TE ZYRES SE  
ADMINISTRIMIT DHE KOORDINIMIT TE PARKUT KOMBETAR TE BUTRINTIT**

Ne mbështetje te pikës 2 te nenit 100 te Kushtetutës dhe te pikës 2 te nenit 29 te ligjit nr.9048, date 7.4.2003 "Për trashëgiminë kulturore", me propozimin e Ministrit te Kulturës, Rinise dhe Sporteve, Këshilli i Ministrave

VENDOSI:

Miratimin e rregullores se funksionimit te Zyrës se Administrimit dhe Koordinimit te Parkut Kombëtar te Butrintit, e cila i bashkëlidhet këtij vendimi.

Ky vendim hyn ne fuqi pas botimit ne Fletoren Zyrtare.

KRYEMINISTRI

**Fatos Nano**

**RREGULLORE E FUNKSIONIMIT TE ZYRES SE ADMINISTRIMIT DHE  
KOORDINIMIT TE PARKUT KOMBETAR BUTRINT**

**KAPITULLI I**

**DISPOZITA TE PERGJITHSHME**

**Pika 1**

Kjo rregullore hartohet bazuar ne:

- a) Ligjin nr.9048, date 7.4.2003 "Për trashëgiminë kulturore"
- b) Ligjin nr.8906, date 6.6.2002 "Për zonat e mbrojtura"
- c) Ligjin nr.8934, date 5.9.2002 " Për mbrojtjen e mjedisit"
- d) Ligjin nr.7908, date 5.4.1995, ndryshuar me ligjin nr.8763, date 2.4.2001, ndryshuar me ligjin nr.8870, date 21.30.2002 "Për peshkimin dhe akuakulturen"
- e) Vendimin e Këshillit të Ministrave nr.450, date 1.7.1998 i ndryshuar me vendimin e Këshillit të Ministrave nr.176, date 3.5.2002 "Për administrimin e qytetit antik të Butrintit"
- f) Vendimin e Këshillit të Ministrave nr.82, date 2.3.2000 "Për shpalljen park kombëtar në mbrojtje të shtetit të zonës arkeologjike të Butrintit"
- g) Vendimin e Këshillit të Ministrave nr.266, date 24.4.2003 "Për administratën e zonave të mbrojtura "
- h) Vendimin e Këshillit të Ministrave nr.531, date 31.10.2002 " Për shpalljen e kompleksit ligatinor të Butrintit dhe të territorit përreth tij zone natyrore, veçanërisht e mbrojtur dhe përfshirjen e tij në listën e ligatinave me rendësi ndërkombëtare, veçanërisht si habitate të shpendëve ujore"

**Pika 2**

Ne këtë rregullore ZAKB do të thotë Zyra e Administrimit dhe e Koordinimit Butrint. PKB do të thotë Parku Kombëtar Butrint.

**Pika 3**

Me vendim të Këshillit të Ministrave nr.82, date 2.3.2000, shpallet park kombëtar në mbrojtje të shtetit zona arkeologjike e Butrintit dhe për administrimin e këtij parku kombëtar ngarkohet Zyra e Administrimit dhe Koordinimit, njësi nën juridiksionin e MKRS-se.

#### **Pika 4**

Për aktet normative që do të zbatohen nga ZAKB-ja ushtron veprimtarinë e tij Bordi i Butrintit, i cili shqyrton dhe miraton strategjinë dhe politikën për zhvillimin, mirëmbajtjen, koordinimin, menaxhimin dhe promovimin e vlerave të Parkut Kombëtar të Butrintit. Për zbatimin e veprimtarisë së tij, Bordi mbështetet në rregulloren e tij të miratuar nga Ministri i Kulturës, Rinisë dhe Sporteve.

ZAKB-ja, në bashkëpunim me Drejtorinë e Përgjithshme të Pyjeve dhe të Kullotave dhe Drejtorinë e Peshkimit, realizon planin e menaxhimit të zonës, në përputhje me ligjin nr.8960, datë 6.6.2002 "Për zonat e mbrojtura".

#### **Pika 5**

ZAKB-ja është person juridik publik që nuk ndjek qëllime ekonomike. Ai e ka selinë në Sarandë me adresë "Ish-Muzeu Etnografik".

ZAKB-ja ka vulën dhe logon e saj, pamja dhe elementet e së cilës janë sipas shtojcës nr.1, pjesë e kësaj rregulloreje.

#### **Pika 6**

ZAKB-ja mbështet, nxit, koordinon dhe mbikëqyr kërkimet shkencore, në bashkëpunim me institucione shtetërore ose private, kombëtare dhe ndërkombëtare për promovimin, ruajtjen, pasurimin dhe ekspozimin e trashëgimisë kulturore, për menaxhimin dhe ruajtjen e mjedisit në Parkun Kombëtar të Butrintit. ZAKB-ja publikon informacion për vlerat e Parkut Kombëtar të Butrintit, duke përdorur botime shkencore, guida, kartolina, periodike dhe materiale të tjera publicitare.

### **KAPITULLI II**

#### **SHTRIRJA GJEOGRAFIKE E PARKUT, PERCAKTIMI I ZONËS SE ADMINISTRUAR NGA ZAKB-JA**

#### **Pika 7**

Parku Kombëtar i Butrinti është shpallur zonë e veçantë, e mbrojtur për trashëgiminë kulturore dhe vlerat e ekosistemit.

Ai mbulon një sipërfaqe prej 25 kilometra katrorë.

Zona përfshin sipërfaqe tokësore dhe ujore, në të cilat ekzistojnë tipare fiziko-gjeografike, specie të florës dhe të faunës, të rëndësishme biogjeografike, ekologjike, ekonomike, hidrologjike, estetike, si edhe qendra të trashëgimisë kulturore, monumente, muze, objekte, të gjitha këto me rëndësi kombëtare dhe ndërkombëtare.

Kufijtë e zonës se administruar janë:

- a) ne veri, fshati Ksamil;
- b) ne lindje, rruga ekzistuese ne drejtim te Konispolit;
- c) ne jug, lumi Pavia, duke anashkaluar Vrinen, drejt fushës dhe duke u futur brenda zones tek liqeni i Bufit;
- d) ne perëndim me gjirin e Butrintit, aty ku kanali i Vivarit derdhet ne det.

Zone e administruar nga ZAKB-ja do te thotë territori i përcaktuar ne hartën ne shtojcën 2, pjese e kësaj rregulloreje.

### **KAPITULLI III**

#### **STRUKTURA ORGANIZATIVE E ZAKB-SE**

##### **Pika 8**

Struktura organizative e ZAKB-se është ajo e përcaktuar ne vendimin e Këshillit te Ministrave nr. 450, date 1.7.1998 "Për administrimin e qytetit antik te Butrintit".

- Drejtori
- Specialisti i arke ologjisë
- Specialisti i monumenteve te kulturës
- Specialisti i mjedisit
- Specialisti i turizmit

##### **Pika 9**

Detyrat dhe përgjegjësitë e drejtorit

Drejton dhe koordinon punën administrative, menaxhuese dhe veprimtarinë ekonomike te ZAKB-se, si dhe përfaqëson institucionin ne marrëdhënie me te tretet.

Mban kontakte dhe marrëdhënie me institucione shtetërore dhe private, me persona juridike dhe fizike, me organizma kombëtare dhe ndërkombëtare.

Koordinon dhe harton plane zhvillimi, te detajuara ne përputhje me natyrën dhe masën e zhvillimit te përcaktuara nga plani i menaxhimit.

Drejton studimin e efekteve mjedisore te çdo ndërtimi ose zhvillimi te propozuar brenda territorit, mbështetur ne ligjin nr.8990, date 23.1.2003 "Për vlerësimin e ndikimit ne mjedis", rregullores se ZAK-se, Parku Kombëtar Butrint dhe planit te menaxhimit.

Vlerëson dhe përdor faktorë stimulues financiare, si grandet, huatë, kontratat ose marrëveshjet e menaxhimit për te nxitur zhvillimin dhe menaxhimin me efektivitet te territorit te Parkut Kombëtar te Butrintit.

Bashkëpunon me drejtorinë e peshkimit për probleme te peshkimit ne territorin e administruar, mbështetur ne ligjin nr.7908, date 5.4.1995, me ndryshimet përkatëse, ne ligjin nr. 8870, date 21.30.2002 "Për peshkimin dhe akuakulturen" dhe kriteret e përcaktuara ne planin e menaxhimit.

Lidh marrëveshje menaxhimi, bazuar ne ligjin nr. 7908, date 5.4.1995 me ndryshimet përkatëse, ne ligjin nr.8870, date 21.3.2002 "Për peshkimin dhe akuakulturen", me persona fizike ose juridike për te ushtruar peshkimin ne territorin e Parkut Kombëtar te Butrintit.

Bashkëpunon me drejtorinë e peshkimit për te ndaluar ose kufizuar peshkimin sportiv sipas zonës, stinës dhe metodës se kapjes, mbështetur ne ligjin nr.7908, date 5.4.1995, ne ligjin nr.8870, date 21.30.2002 "Për peshkimin dhe akuakulturen" dhe kriteret te planit te menaxhimit.

Ndalon gjuetinë ne te gjithë territorin e Parkut Kombëtar te Butrintit, bazuar ne nenin 6 te ligjit nr.8906, date 6.6.2002 "Për vlerësimin e ndikimit ne mjedis".

Përcakton numrin, vendin, llojin dhe veprimtaritë turistike ne territorin e Parkut Kombëtar te Butrintit sipas planit te menaxhimit, duke koordinuar me Ministrinë e Kulturës, Rinise dhe Sporteve dhe Ministrinë e Turizmit, mbi bazën e strategjisë se zhvillimit te turizmit ose planeve te zhvillimit turistik te rajonit te Sarandës.

Bazuar ne ligjin nr.9048, date 7.4.2003 "Për trashëgiminë kulturore", ndalon ndërtimin e ndërtesave ne territorin e Parkut Kombëtar te Butrintit.

Aprovon restaurimin e ndërtesave ekzistuese ne park, pas projektit te miratuar për këtë qellim, për ruajtjen e karakterit te veçante te territorit, për te parandaluar veprime qe bien ndesh me qëllimin e krijimit te Parkut Kombëtar te Butrintit. Rikonstrukcioni i godinave ekzistuese duhet te realizohet ne përputhje me konceptin e planit te menaxhimit, duke respektuar traditën e zonës.

Miraton vendqëndrime te përshtatshme, sipas kriteret te planit te menaxhimit për

automjetet qe hyjnë ne territorin e Parkut Kombëtar te Butrintit.

Mban lidhje te vazhdueshme dhe informon strukturat e pushtetit qendror dhe vendor, për zhvillime te karaktereve te ndryshme qe kryhen jashtë territorit te Parkut Kombëtar te Butrintit, por qe mund te kenë impakte ne park.

## Pika 10

Detyrat dhe përgjegjësitë e arkeologut të ZAKB-se

Përpilon evidencat arkeologjike në territorin e Parkut Kombëtar të Butrintit për monitorimin dhe mbrojtjen e pasurive arkeologjike në territor.

Nuk lejon asnjë gërmim arkeologjik pa pasur miratimin e Bordit të Butrintit mbi projektin e paraqitur dhe që është në kundërshtim me ligjin nr.9048, datë 7.4.2003 "Për trashëgiminë kulturore".

Nuk lejon gërmime arkeologjike pa praninë e specialistëve shqiptarë dhe përfaqësuesit të ZAKB-se.

Rregullon dhe organizon transportin e objekteve arkeologjike, duke penguar zhvendosjen ilegale të tyre.

Arkeologu në ZAKB është përgjegjës për hartimin e programit vjetor në bashkëpunim me Institutin e Arkeologjisë në baze të objektivave dhe politikave të zhvillimit, të miratuara nga Bordi i Butrintit.

Ndjek punimet e mirëmbajtjes dhe punime të tjera në park, me qëllim ruajtjen e vlerave arkeologjike.

Zbaton praktikën me të mira arkeologjike, duke përdorur teknikat dhe studimet akademike bashkëkohore.

Kryen kërkime arkeologjike sipas planit shkencor njëvjeçar, të miratuar nga Bordi i Butrintit.

Ndihmon në hartimin e programit edukativ, duke synuar shndërrimin e parkut në një qendër kulturore, edukimi.

Organizon programe për studente për qëllime arkeologjike.

Siguron marrjen e masave që objektet arkeologjike të zbuluara të ekspozohen ose të mbulohen për ruajtje sipas metodave bashkëkohore.

Përpilon materiale për arkivin në lidhje me zbulimet arkeologjike.

Përfaqëson ZAKB-në në ekspeditat e përbashkëta arkeologjike në territorin e parkut. Parashikon, në bashkëpunim me specialistin e Institutit të Monumenteve të Kulturës, fondet që duhen për ruajtjen e rrënojave që dalin gjatë gërmimeve arkeologjike.

Punon për njohjen në tërësi të vlerave arkeologjike të parkut në mediet e shkruara dhe elektronike.

## **Pika 11**

Detyrat dhe përgjegjësitë e specialistit të monumenteve

Specialisti i monumenteve në ZAKB është përgjegjës për hartimin e programit vjetor në park, në bashkëpunim me Institutin e Monumenteve të Kulturës, sipas politikave dhe objektivave të zhvillimit, të miratuara nga Bordi i Butrintit.

Zbaton një program vjetor të hartuar në bashkëpunim me Institutin e Monumenteve të Kulturës dhe të miratuar në Bordin e Butrintit.

Dokumenton monumentet përpara fillimit të çdo procesi restaurimi.

Respekton rregullat e restaurimit të miratuara nga Këshilli Kombëtar i Restaurimeve.

Harton një program vjetor që synon ruajtjen e monumenteve në gjendjen ekzistuese, si dhe hapat që duhen marrë për të parandaluar dëmtimet.

Vrojton kushtet fizike të monumenteve dhe i raporton drejtorit të ZAKB-se dhe Institutit të Monumenteve të Kulturës.

Përfaqëson ZAKB-në në projektet restauruese në territorin e parkut dhe merr pjesë në ekspeditat arkeologjike në këtë territor.

Monitoron gërmimet e kryera rreth monumenteve, duke informuar ZAKB-në mbi ecurinë dhe gjendjen e gërmimeve dhe impaktin e tyre në monumente.

Ndalon gërmimet dhe restaurimet në monumente, kur këto gërmime dhe restaurime dëmtojnë strukturën e monumenteve dhe bien ndesh me ligjin nr.9048, datë 7.4.2003 "Për trashëgiminë kulturore".

Ndalon gërmimet dhe restaurimet në territorin e Parkut Kombëtar të Butrintit, kur këto dëmtojnë mjedisin.

Menaxhon dhe kontribuon në rritjen cilësore të Muzeut të Butrintit, duke e kthyer atë në një qendër të rëndësishme edukimi në park.

## **Pika 12**

Detyrat dhe përgjegjësitë e specialistit të mjedisit

Monitoron dhe merr masat e nevojshme për mbrojtjen dhe ruajtjen e karakterit funksional të territorit.

Ben sugjerime për zgjerimin e zonës së mbrojtur të administruar nga zyra.

Monitoron habitatet, duke përdorur të gjitha mënyrat, sipas sezonit dhe në çdo kohë.

Merr masa mbrojtëse kundër zjarrit, sipas nevojave dhe zonave të përcaktuara në hartë. Ndihej bashkëpunon me organizatat joqeveritare, që punojnë për ruajtjen e territorit dhe burimeve të tij natyrore.

Ndërhyn për të ndaluar dëmtimet që mund të shkaktohen në mjedisin e Parkut Kombëtar të Butrintit.

Nis dhe zbaton projekte që përmirësojnë kushtet mjedisore dhe habitatet në territorin e Parkut Kombëtar të Butrintit.

Specialisti i mjedisit është përgjegjës për hartimin e programit vjetor në park, në bashkëpunim me Ministrinë e Mjedisit, sipas objektivave dhe politikave të miratuara nga Bordi I Butrintit.

Kontrollon zbatimin e kuadrit ligjor për mbrojtjen e mjedisit në park.

Merr pjesë në përgatitjen e projekteve dhe veprimtarive në fushën e mjedisit dhe ndjek zbatimin e tyre.

Informon drejtorin e ZAKB-se, Bordin e Butrintit dhe Ministrinë e Mjedisit mbi shkeljet e ligjit dhe parregullsitë në territorin e parkut.

Identifikon masat që duhen të merren për miradministrimin e burimeve natyrore, florës, faunës, pyjeve dhe specieve të rrezikuara.

Bashkëpunon me inspektorët e mjedisit të Agjencisë Rajonale të Mjedisit në Sarandë për mbrojtjen e mjedisit në Parkun Kombëtar.

Bashkëpunon me strukturat e pushtetit vendor për miradministrimin e pyjeve dhe peshkimit.

Informon drejtorin e ZAKB-se mbi impaktet që kanë në mjedis projektet e propozuara për zbatim në park.

Bashkëpunon me organet e pushtetit qendror, si edhe me organe të pushtetit vendor për instalimin e sistemeve të ujërave të zeza apo hedhjes së mbeturinave për fshatrat brenda territorit ose në kufi me të.

Vlerëson gjendjen e resurseve natyrore në territor, nivelin për përdorimin e tyre maksimal, si edhe mundësinë e ripërtëritjes së ekosistemit, bazuar në ligjin nr.8934, datë 5.9.2002 "Për mbrojtjen e mjedisit", si edhe ligjit nr.9048, datë 7.4.2003 "Për trashëgiminë kulturore".

Vlerëson aktivitetet social-kulturore dhe ekonomike, të parashikuara për t'u zhvilluar brenda territorit, të cilat mund të kenë ndikim në mjedis dhe informon drejtorin e zyrës.



### **Pika 13**

Detyrat dhe përgjegjësitë e specialistit të turizmit

Specialisti i turizmit është përgjegjës për hartimin e programit vjetor në park, në bashkëpunim me Ministrinë e Turizmit, sipas objektivave dhe politikave të miratuara nga Bordi i Butrintit.

Detyrat dhe përgjegjësitë e tij janë:

- Kontrollon zbatimin e kuadrit ligjor për zhvillimin e turizmit në park.
- Merr pjesë në përgatitjen e projekteve dhe veprimtarive turistike dhe ndjek zbatimin e tyre.
- Harton informacione dhe statistika mbi numrin e vizitoreve në park dhe të dhëna të tjera të fushës dhe ia paraqet ato drejtorit të ZAKB-se.
- Propozon masat që duhet të merren për miradministrimin dhe miremenaxhimin e resurseve turistike të Parkut Kombëtar të Butrintit.
- Bashkëpunon me struktura të pushtetit vendor, me agjenci turistike, struktura hoteliere për rritjen e numrit të vizitoreve në park.

### **Pika 14**

Përfaqësuesi i Bashkisë së Sarandës pranë kësaj zyre koordinon dhe mban lidhje ndërmjet ZAKB-se dhe pushtetit vendor Sarandë për probleme të ndryshme, që kanë të bëjnë me menaxhimin e veprimtarive në park.

## **KAPITULLI IV**

### **ORGANIZIMI FINANCIAR**

### **Pika 15**

ZAKB-se është person juridik publik. Shpenzimet e ZAKB-se përballohen nga MKRS-ja dhe të ardhurat e PKB-se.

Institucionet përfaqësuese të Bordit të Butrintit kontribuojnë financiarisht për zbatimin e projekteve në park.

ZAKB-ja mund të marrë donacione dhe sponsorizime të ndryshme edhe nga institucione ose organizata të ligjshme, shtetërore ose joshitetore, kombëtare ose ndërkombëtare.

Specialistet dhe punëtorët shtese paguhen nga të ardhurat e ZAKB-se, sipas rregullave në fuqi.

## **Pika 16**

ZAKB-ja paraqet për miratim ne MKRS çdo 30 qershor, planin e veprimtarive dhe te investimeve për vitin e ardhshëm, te shoqëruar nga preventivat përkatëse dhe te miratuar me pare nga Bordi i Butrintit.

## **KAPITULLI V**

### **RREGULLAT PER ORGANIZIMIN E VEPRIMTARIVE KULTURORE-ARTISTIKE DHE VEPRIMTARITE E NDALUARA NE TERRITOR**

## **Pika 17**

Koncertet dhe veprimtaritë kulturore-artistike ne territorin e Parkut Kombëtar te Butrintit bëhen me aprovimin e drejtorit te ZAKB-se dhe pas nënshkrimit te kontratës se rregullt midis dy palëve. Këto veprimtari kryhen bazuar ne ligjin nr.9048, date 7.4.2003 "Për trashëgiminë kulturore".

## **Pika 18**

Veprimtaritë e ndaluara ne territorin e Parkut Kombëtar te Butrintit

Ne territorin e parkut ndalohen:

Kryerja ose zhvillimi i aktiviteteve pa marrëveshje paraprake me drejtorin e ZAKB-se, si edhe ne kundërshtim me ligjin nr.9048, date 7.4.2003 "Për trashëgiminë kulturore" apo me kushtet e vena ne lejen e lëshuar për këtë qellim.

Gërmimi pa miratimin e Bordit te Butrintit dhe pa marrëveshje përkatëse me drejtorin e ZAKB-se.

Dëmtimi i objekteve arkeologjike ose monumenteve.

Mbledhja dhe transportimi i objekteve arkeologjike pa lejen e drejtorit te ZAKB-se.

Hyrja ne ambientet me objekte arkeologjike ose muze jashtë orarit te caktuar, pa leje te veçante nga drejtori i ZAKB-se.

Organizimi dhe ushtrimi i aktiviteteve ekonomike dhe sociale, ne kundërshtim me ligjin nr. 9048, date 7.4.2003 "Për trashëgiminë kulturore", pa lejen mjedisore te Ministrisë se Mjedisit dhe lejen e Bordit te Butrintit, si dhe ne rast te mospërbushjes te kushteve shtese ndaj lejes.

Dëmtimi i vegjetacionit natyral ose artificial nëpërmjet lëvizjes se pajisjeve, zjarrit, nxjerrje gurësh dhe aktivitete te tjera.

Prerja ose dëmtimi i pemëve, ne kundërshtim me legjislacionin shqiptar ne fuqi.

Mbledhja, shqetësimi, shkatërrimi, dhe tregtimi i bimëve, kafshëve, jovertebroreve ose organizmave ujore ne kundërshtim me ligjin nr.8934, date 5.9.2002 "Për mbrojtjen e mjedisit", si edhe ligjin nr.8906, date 6.6.2002 "Për zonat e mbrojtura".

Ngacmimi dhe shkatërrimi i vezëve te zogjve, foleve ose zonave rreth foleve.

Peshkimi ne territorin e Parkut Kombëtar te Butrintit, ne kundërshtim me legjislacionin ne fuqi dhe me rregullat shtese, te miratuara për këtë qellim.

Ushtrimi i skive ne ujë ose skafeve te fuqishme ne territorin ujor te Parkut Kombëtar te Butrintit.

Hedhja e pajisjeve, plehrave, materialeve inerte dhe mbeturinave, me përjashtim te vendeve te përcaktuara për këtë qellim.

Transportimi, hedhja, groposja ose trajtimi i mbetjeve te rrezikshme ne territorin e Parkut Kombëtar te Butrintit, bazuar kjo ne nenin 22 te ligjit nr.8934, date 5.9.2002 "Për mbrojtjen e mjedisit" .

Ndotja e tokës ose e ujit brenda territorit nga aktivitete ekonomike ose te tjera, duke përfshirë rrjedhje karburanti, vaji ose elemente te tjera nga mjetet lundruese.

Fotografimi ose filmimi për arsye komerciale, ne kundërshtim me ligjin nr.9048, date 7.4.2003 "Për trashëgiminë kulturore".

## **KAPITULLI VI**

### **RUAJTJA DHE SIGURIMI I TERRITORIT TE PARKUT KOMBETAR TE BUTRINTIT**

#### **Pika 19**

Drejtori i ZAKB-se lidh marrëveshje me persona fizike ose juridike për te siguruar informacion për vizitorët, për te mbikëqyrur territorin dhe për te siguruar zbatimin e masave mbrojtëse, te përcaktuara ne piken 20 te kësaj rregulloreje.

#### **Pika 20**

Detyrat dhe përgjegjësitë e rojeve te Parkut Kombëtar te Butrintit

Sigurojnë zbatimin e rregullave ne territorin e Parkut Kombëtar te Butrintit dhe mbrojtjen e aseteve natyrale dhe kulturore.

Kërkojnë ndihmën e Policisë se Shtetit, shërbimit zjarrfikës dhe shërbimeve te tjera te emergjencës ne kryerjen e detyrave te tyre.

Japin informacion dhe ndihmojnë vizitorët gjate vizitës ne territor.

Mbledhin informacion për gjendjen e monumenteve kulturore, arkeologjike dhe natyrore te parkut dhe ia raportojnë autoriteteve te Parkut Kombëtar te Butrintit.

Patrullojnë territorin për te zbuluar dhe për te neutralizuar çdo aktivitet qe nuk është ne përputhje me legjislacionin shqiptar ne fuqi dhe rregulloret e miratuara për këtë qellim, si edhe i raportojnë autoriteteve përkatëse kur çështja është jashtë kompetencës se tyre.

Vrojtojnë dhe i raportojnë drejtorin e ZAKB-se për aktivitetet ekonomike, social-kulturore dhe turistike qe zhvillohen ne territor.

Vrojtojnë dhe raportojnë drejtorin e ZAKB-se për çdo zhvillim brenda territorit.

**KRYEMINISTRI**

**Fatos Nano**